

ادبیات عمومی مجموعه سی

بسم الله الرحمن الرحيم

محاربه حاضره ايله تركرك تاريخنده بر « رنه سانس » دورى آچيلور .
بوگونه قدر متعب و غليظ بربلداى كابوس دوام ايتمكده ايدى . شرقى روما
دولتى تخریب، مشرف انهدام اولان خلافت و سلطنت اسلاميه يي هيچ برپادشاه
سلفك يتشدیره مدیكى حدودلره ایصال ایدن عثمانلیلر ایکی سنه اولنه کلنجهیه قدر
بردور توقفده بولونیورلردی . حرب عمومی بزم موجب انتباه و تیقظمز اولدی .
توفیقات ازلیه صمدانیه دن استعانه ايله بومبارزه مقدسه استخلاصه آتلدق .
قایتولاسیونلری ، اجانبك موجودیتمز اوزرینه وضع ایتدکاری حجر و حجزلری
قالدیردق . ترقی و تعالی یه قطعیا قرار ویردك . ایشته بونك ایچوندركه هر کونمز
حرب و ضرب ايله کچدیكى حالد ، بوايکی سنه ظرفنده حصول پذیرا اولان ترقیات
واصلاحات درجه سنده تکملاته مملکتمز هیچ بروقت نائل اوله مامشدی .
ایشته بوانقلابات آره سنده تکاملات فکریه یه اشتراك ، عنعنات مستحسنه مز
داخلنده تجدواتی تسهیل ، متفکرین وارباب قلممزه بر محل مباحثه و مناظره
تهیه ایتك مقصدلریله بو « ادبیات عمومی مجموعه سی » نی تأسیس ایدیوروز .

[ابن موسی] دن بر صحیفهٔ حماسه

عبد الحق حامد بك اقتدینك دور سابقده ابداع ایتدیكى [ابن موسی]
 فاجعه سنی صنف منوریمز سنه لردن بری بویوك براشتیاق ایله بکلییوردی .
 مجموعه من ، بوهر جمله سی بر بدیعۀ الهام اولان معلقه نك حماسه اسلامه دائر
 و غیر منتشر بر صحیفه سنی مملکتك حضور عرفانه عرض ایدر .

منظر

« طلیطاه . مسلمك خیمه سی درونی . »
 « خارجه ده اصوات »

حضار

« مسلم ایله عذرا بنت عنتر »

مسلم

الله عشقنه بر لحظه طور ! بر دقیقه انصاف ! بر آن صراحت !

عذرا

خارجده کی اصواتی ایشتمیورمیسین ؟

مسلم

ایشیدیورم . فقط بز بر بر مزك اولادقی ؟ بر کون برابر اولمایه لمی ؟

عذرا

بن بو اردونك قزییم . اردو بر ساعته قدر کیدیور .

مسلم

تأهل ایتدك ، ده یارم ساعت اولدی که تأهل ایتدك . آیرلق ایچونمی اوله نیلیر ؟

عذرا

عسکر بر ساعته قدر حربه کیدیور . بنده کیده جکم !

مسلم

آه ! ساق نشاط اولان - غانیمد - ك دختر کل پیکری خونریزی اولمی در ؟

عذرا

بن بولسان مستانه دن ، اساطیر و افسانه دن آ کلامام . اسلام عسکری کیدیور .
 او یله بریره کیدیور که اطراف و آفاقده نوسال فقط حاکم استقبال برملتک ، قلیل فقط

جلیل ومعظم بر جمعیت ناجیه نك آمالی تحشد ایتش ! بریورہ کیدیور کہ حوزہ مظہریتندہ
حالمزلہ استقبالمز تلاق ایدہ جك ! رفقای نکاحلرندن اولدیغمز طارقلہ زہرا برابر ،
عسکر ، اسلام عسکری بر ساعتہ قدر میدان حربہ کیدیور ، بنده کیدہ جکم ! میدان
حرب ! اورادہ آقہ جق قان نہرلری صلح آتینک شفقی در ! برکون بتون انسانیت
اونک سایہ حسنا تندہ تنور ایدہ جکدر !

مسلم

سن شمدیدن اوشفقك صانعہلرندن اولسہن اولمازمی ؟ میدان حرب ، او منظرہ
مدہشہ سندن صمدانیت رحیمہ نك توحش ایتدیکی محشر بشر ، اوقضا وقدرک بی طرف
طور دینی جہنم ، انظار پیامبرانہ قارشو بر پردہ اولان اونار مظلم ومشعوم ، فساد
وشیطنت اوجاقلرندہ فوران ایدن اونجار احر عذرا کی بر صیانت ملکنہ می جولانکاه اولسون ؟

« خارجدہ اصوات ، عذرا کیتدکجہ مہیج »

مسلم — دوام ایلہ —

بوجولانہ قارشو نصل دیہیم ؟ وجدان کہ ظل یزداندر ، رعشان اولمازمی ؟ ازلیت کہ
عظمت بی پایانی سبیلہ مظلم کورونور ، ماتم ایتزمی ؟ ابدیت کہ اہصاد محیطہ سی جہتیلہ
مائی در ، لکہ دار اولمازمی ؟ والوہیت کہ عادل فقط قہار ، صبور ، لکن منتقمدر ؛
نہ زمانہ قدر صبر ایدر ؟

عذرا — آرادہ ایلہ دیشاریسی کوسترہ رک —

نم صبرم یوق ! بن کیدہ جکم ! حرب ، وطنمک یا احما یا خود احیا وابقا اولنہ جفی
بر ؛ حرب ، حیات ایلہ مماتک تقابل ایتدکلری میدان ! حرب ، معصومین ومظلومینک آہ
وفریادیلہ مشتعل بر نائرہ کہ ہر شرارہ سندن بر وطن وجودہ کلیر ، کہ ہر بر آووج
کولندن بر مادر تشکل ایدر ، کہ ہر بر سمندری بر روح فدائیدر ؛ حرب ، بدبختان
سرمازدہ نك ایصندی بی براوجاق ، کہ طمارلرندہ کی قان ؛ یورہ مکدہ کی حرارت سمواتہ
عروج ایدن لہیبندندر ، کہ سکان زمین ایلہ سکنہ آسمان اوندہ اثبات وجود ایدرلر ؛
حرب انسانیتک فنادن انتقام آلمسی ، عجزک قوتلہ ، فنانک بقا ایلہ اوغراشمسی دیئک
اولان حرب ؛ رودریقک قلیجی جولیانوسک ضربہ سیلہ زیر وزبر ایدن واسطہ ؛ بر
ظالمک کلہ سنی بر مظلومک پنچہ سنہ تودیع ایدن آلت ؛ ضعفانک آیاقلرندہ کی زنجیری
اقویانک بیونلرینہ کچیرن قوت ؛ بوکون آفاقکیر استیلا اولدینی حالہ بنی کیتمکدن منع
ایتمک ایستہ دیئک حرب ؛ حد وحسابی اولیان مصائب ومناہیسی ، وآفات ودواہی
بی تناہیسیلہ برابر سما قدر عالی ، ابدیت قدر متعالی ، محشر قدر معظم وأولوم قدر
الہی در !